

帶經堂集

帶經堂集卷三十二

歙門人程普校編

新城王士禛貼上

漁洋續詩十

丁巳稿

仇英九成宮圖

唐九成宮即
隋仁壽宮

君不見隋皇初作仁壽宮累榭宮臺宛相屬羃山
堦塹幾百里役卒崩騰死崖谷功成厭見獨孤公
不知怨自封郎築宮車晚出凡幾載已見迷樓起
相續虬鬚真人西入關削平六合營長安青山碧
水自無恙雕牆峻宇猶人間年年清暑備法駕千
乘萬騎驤孱顏醴泉漢出如沆瀣下入涇渭爲通

川步欄周流鑿山翠雲窓霧閣當空懸化人之臺
屹中天銅烏六月雄風寒披襟萬仞待聽馭咸陽
宮闕如雲煙宮娃笑語翠微上阿監絡繹青冥邊
羽林千牛萬萬輩解車放馬紛華旃從來世事有
倚伏太平倏過開元年白頭拾遺此駐馬愁聞林
藪啼哀猿畫圖想見全盛日令我涕淚雙闌干

脚痛

去年牙齒豁一痛連躡車今年腰脚痛登降須人
扶吾年纔四十早衰信有諸憶昔登金焦南遊窮
具區騰趨如飛猱神尻駕空虛西行極岷峨奇觀

凌清都兩脚輕屣顏邛杖非吾須十載一彈指肉
緩筋亦驚況復苦踈盤舉步多崎嶇始悟咸其腓
初九利安居既不策捷足安用悲泥塗誰能相比
附如彼蟹與驢

題昌黎詩後

淮陰舉足分項劉運籌帷幄鄼與留河汾門下羅
將相房杜李魏非常儔西京功業繼三代貞觀仁
義被九州惜哉韓公不及此但取將相酬恩讐

牛捕魚追述淮上所見

朝過洪澤湖波浪如銀屋逍遙魚蠻子跣駕兩轂

鯨風聲撼蛟宮雪浪及牛目奮迅絕有力快作龍
象蹴魚蠻坐拋網安穩如掣幅又如蕩輕槎撇捩
出洄洑奈何太牢氏凌暴及水族我聞造化功生
物異川陸爾牛司服箱播種宜種稂胡樂狎波濤
下與三足逐失性爲不祥作詩以相告

悼亡詩三十五首

哭張宜
人作

一錯誰能鑄六州藁砧無復望刀頭當年對泣人
何在獨卧牛衣哭暮秋

少小香閨熟女儀雞鳴長自軫風詩君如德曜齊
眉日我愧樊英荅拜時

幾年蹤跡判西東那得歡娛一笑同腸斷年時垂

淚別天涯辜負試燈風

予以丙辰正月十一日北行遂成永訣

二十年前烹伏雌清貧風味兩心知奩中明鏡流塵掩忍照吳霜滿鬢絲

門第河東雙戟圍當年燕子傍誰飛可憐陌上花開後常送香車緩緩歸

小閣垂簾日掃除爐熏茶具宛精廬紅囊揀得釵頭茗手瀹清泉伴著書

千里窮交脫贈心蕪城春雨夜沉沉一官長物吾

何有却損閨中纏

直善切

臂金

辛丑春閨中友人許天玉公車過廣陵以資斧匱乏告子適無

三
一錢宜人解脫上

條脫付于贈之

樵蘇絕爨未知愁林下風期矢白頭廿載無衣搜
畫篋不曾悔却嫁黔婁

雪白花紅繡襦齊頻年醜面祝中閨牙牙學語今
何似忍聽驕兒索母啼

病中送我向南秦感逝傷離涕淚新長憶啼猿斷
腸處嘉陵江驛雨如塵

灞橋秋雨望秦川劍閣西風聽杜鵑萬里不歸歸
有路雙魚何處達重泉

寸草春暉恨未休何時負土泣松楸九泉憑報慈

親道四十兒今已白頭

先慈宜人以壬子見背

三載西風鴈影分登高淚盡隴頭雲從今腸斷重

陽節又採寒花酌細君

先兄西樵以癸丑秋歿

自失雙珠淚暗垂幾年石闕口啣悲而今一笑黃

泉裏玉雪嬌兒見母時

兒沂以辛亥病歿渾以壬子殤

楚客秋悲易斷腸畏逢風雨近重陽那堪落葉哀

蟬曲恰爲離人泥

乃計切

悼亡

宜人以重九後一日歿

早歲曾期共隱居祇應桓孟得相如青山縱有歸

來日更與何人挽鹿車

鋪首經秋澁綠苔承塵蛛網任成灰祇餘金縷帶

猶在爭忍無情布施來

遺挂空存冷舊熏重陽閣閉雨紛紛方諸萬點鮫
人淚灑向窮泉竟不聞

肅肅靈風冷總緯亭亭孤月掩重扉寶釵明鏡俱
黃土悔煞秦嘉上計非

帖子宜春認舊題妝樓人去草萋萋東風不啓歲
蕤鎖一任空梁落燕泥

樓角參差幾曲欄繞欄親種碧琅玕月明昨夜風
驚竹翠袖何人倚暮寒

名園山色畫橋通兩樹瓊花雪映空一自東風斷

消息更無人惜玉玲瓏

外家黃山下東園繡毬二株花時甚盛宜人每歲折枝置膽瓶中以爲常

春前小別死生分望斷新阡宿草墳我似東坡老居士何年歸哭魏城君

年年辛苦寄冬衣刀尺聲中玉漏稀今日歲殘衣不到斷腸方羨雉朝飛

愁見新年改故年朔風吹雪欲寒天黃金屈戌中宵閉長伴鰥魚夜不眠

續絃膠與返魂香碧海青天路渺茫若使少君真有術不辭千里到稠桑

熒熒薤露葉還低華屋山丘理亦齊四十年來成

三
小劫匆匆何暇唱黃雞

春事愁中復病中可憐寒食到匆匆故園夢去瀟
瀟雨一樹棠梨照殯宮

光陰如水去堂堂纔過清明餅餌香故扇依然畫
蟬雀可憐零落篋中藏

維摩天女本同心不二門中事共尋今日臨岐一
揮手始知彈指去來今

藥爐經卷送生涯禪榻春風兩鬢華一語寄君君
聽取不教兒女衣

於戲切

蘆花

鶴骨維摩丈室棲此心已作絮沾泥了知起滅無

生死法喜如何更有妻

陌上鶯啼細草薰魚鱗風皺水成紋江南紅豆相思苦歲歲花開一憶君

錦瑟年華西逝波尋思往事奈君何若爲乞得江郎筆應較文通恨賦多

宦情薄似秋蟬翼愁思多於春繭絲此味年來誰領略夢殘酒渴五更時

北山兄約遊摩訶菴不果往却寄

天色欲雨鳩勃礫麥苗剡剡翠始齊白石莊前入山徑已有犂确紛高低春湖靴紋漾綵縈遠山玉

立森角圭荷蓑簪簪驅繭栗垂竿拍拍驚鳬鷺漁
陽地寒花事晚春陰風氣恒慘悽今朝乍霽日暄
暖垂楊蘸水新生稊小桃點點杏苞折帶腰草綠
紛萋萋諸公蹋青拂晨出果下銜尾聞驕嘶郎官
頭白老簿領經年坐困如醢雞自嗟樊雉苦籠絳
決起安得排雲霓況逢寒食催上冢紙錢麥飯澆
棠梨感念存歿淚雙迸玉壺那復相提攜賦詩望
遠但咄咄遊心已過香山西

聞方山與北山諸公連日出遊戲寄

公子春蕪白鼻騮病夫擁褐客天涯城南幾日無

風雨十里徐熙落墨花

曹升六謝千仞攜酒過飲宋牧仲張杞園亦
至同賦長句二首

陵州羅酒玉雪清青州金露琥珀潏直沽冰開酒
船到屬車捆載連瓶罌二子提挈肯過我鴟尾交
臥紛縱橫我愛徐景山不知曹事唯酒鎗復愛謝
安西玩弄元子如老兵眼中況是我輩客談天炙
轂聲彭觥一斗枯腸芒角生五斗甬中鱗甲平一
石曠若遊八極逍遙齊物無虧成幽州二月草始
萌小桃照地如紅鞵天涯酒人不易得何必琴筑

琵琶箏十擲輒健詎緣拙三語作椽誰所令蠟淚
成堆冠幘墮西南月作金盆傾

昔聞馬文淵居後欲軒前欲輕又聞樂將軍賤貧
辱身貴快意此語非長者亦復非遊戲勁翻扶搖
九萬里豈識青冥更垂翅鳶肩火色多少年一老
行吟獨憔悴唯應中山釀供我千日醉駃騠爲戲
駝作羹有酒如澠那復記千秋亭上相叫呼不知
何與癡人事丈夫不得手執文二及身領漁陽萬
突騎親射蠻氍縛鬼章誰識鄧先好奇計此酒須
滿百斛船使我反覆沒飲如渴驥子路百榼堯千

鍾黃土誰能別愚智諸君不酺閣當閉舉解徑須
煩杜蕢

又賦絕句

石帆山後黃茅屋一樹寒梅作意香長憶花開風
雪裏臥聞春雨滴糟牀

宣和打馬圖

前馬奔馳後馬逐萬馬奔騰隘川陸初看逐隊來
玉門又見爭先度函谷虎曾彗尾骨權奇千里追
風競齊足傳聞天馬是星精豈與凡材同碌碌扼
窩據險一敵萬倒行逆施歛馳突漫言稱德不稱

力徑簫浮雲何太速得意橫行彼一時詎少鹽車
太行麓穀囟晡秣朝飛龍咫尺君門上天育那知
高步易顛蹶夾漸一朝遭困辱莫誇棗脯與文繡
世事由來有翻覆直須十丈的顛飛待向黃池更
歎玉

曹正子邀同家兄子側及諸君豐臺看芍藥
晚過祖氏園亭八首

回首旗亭畫壁時重來已是十年遲應劉逝後風
流盡只有恒河照鬢絲

昔合肥公招同公藏茗文諸
君遊此今公與公藏皆歿矣

依然春草樊川路並馬來過覆盜門記得城南天

尺五綠蕪紅藥水邊村

陂塘點點烏犍出夏木陰陰白鳥飛也似江南好
風景水田一帶學僧衣

宮錦千絲費翦裁詎他婪尾殿春盃老顛賸欲相
料理乞取齊奴步障來

雨雨風風態自殊花花葉葉不曾孤更添練鵲和
蟬蝶便是徐熙六幅圖

霑濕春衣更不嫌花枝姪姪雨廉纖鬢絲禪榻心
情改閑看兒郎插帽簷

沙禽一一事高格煙柳斜陽初弄姿更愛風標兩

公子水荳花外立移時

晚晴賦白鷗爲潛來
今邈風標之公子

水檻清涼跂脚眠菱花菰葉一溪煙阻風中酒當年事絕憶春江上水船

秦鏡詞爲袁松籬作

熒熒古鏡雙盤龍流傳本出咸陽宮秦時明月至今在剥落泥沙露光彩當年秦并六國時後宮閉置千雙眉守宮注臂鏡照膽三十六年君不知華陰道上逢山鬼輜輶東來祖龍死美人鐘鼓散如煙此鏡蒼涼閱朝市憶昔大收天下兵十二金人初鑄成還令餘事作奩鑑太乙下視蛟龍驚劉興

羸蹶何倉猝金鑑千秋如一髮秦鏡虛誇照膽寒
不照長城多白骨

漢祖入咸陽宮得方鏡廣四尺
九寸照見五臟見西京雜記

送韓武康

清遠吳興郡防風地最幽焙茶春掩靜收蠟午煙
稠問俗知餘不懷人弔隱侯到來矜拄笏紅葉萬
山秋

黑兔

烏非黔而黑鵠非浴而白五行各有稟理不相假
借爰爰東郭君託體依皓魄胡爲明月精色與玄
冥易疑彼蟞食月兩吻未決折搗藥不中度翻爲

蟲豸涅貢君明白黑此事竟何益一笑杯酒空不
記狐非赤

吳匏菴有銅雀瓦硯以示某公惡曹氏之人
拔劍碎之沈石田爲於扇上作破硯圖商
丘武進士胡琳得之珍祕尤甚病且死手
握扇不可解遂以殉葬牧仲爲述此事因

作詩

古瓦出漳水黝質謝磨礱建安詎非珍苦爲老瞞
涕拔劍等睨柱白壁輕涕唾譬彼孔文舉氣使丞
相箋畫師石田翁援筆寫高座星斗忽破碎珠玉

紛錯磨爲圖本游戲勝事遂流播異哉胡將軍射
虎黃間大結習嗜奇古購致雜坐臥罷官無尺椽
風雪甘凍餓提攜有神物光照幽壤破一笑蘭亭
書昭陵殉非過

與董蒼水彭駿孫小飲子吉學士齋同限箇
字寄諸乾一進士

長安風塵日堀堦扇障不能衣苦澆天官昨占月
離畢十日愁霖足高臥高車大馬諸貴人今雨蕭
條誰肯過玉峰學士數相見打門不辭泥沒髀今
朝置酒招我飲黃雀披綿鯖鮓剉百榼以後呼酪

奴白絹斜封朱印破天下健者今董公富貴浮雲
輕涕唾彭郎未奉一囊粟路鬼揶揄甘凍餓抱膝
誰信比管樂高論依然遡卿軻世情但競牢石耶
女子猶知伯休那酒酣岸幘忽大笑吾曹蠶絲自
纏裏青山一髮江南路雨笠煙蓑有幾箇細林主
人老耽隱枕上九峰青錯磨漁樵近局不爭席復
有名僧伴高座空山水流花又開不識都門送臨
賀我生未覩細林面聞君快語殊已瘳已瘳見
山海經當年
我作萬里遊劍閣西風聽鈴馱凌雲九峰悔輕別
筋駑肉緩四體情他年但乞五湖長繞話蓴鱸口

先哆未須木石笑吳兒小海歌成我當和

友人送白蓮花爲詠

無復澄江載酒船折枝猶帶五湖煙香來月白風
清裏花放叢祠水驛前鴨唼池萍微雨後犀垂簾
押夕陽天魯連陂上新秋色觸忤閑愁又一年

張晴峰員外園亭聽金山人彈琴同訥菴學
士北山都諫作

平生慕古澹頗笑箏笛耳愛此太古音寥寥寄絃
指客來江海上偶契希夷旨髣髴七里灘松風入
江水曲罷孤月明溪光散清泚主客一無言露坐

攬衣起

送新安許生生方城子

方城名楚有新安江賦傳於時

一賦曾高六代名
無人不道許方城
郎君惜別扁舟興
夢想新安水至清

初秋示蒼水

零落交遊感式微
與君邂逅忍相違
隆中自許真名士
殿上誰知大布衣
越燕巢空秋近社
鱸魚風起夢思歸
先生未是平原客
玉貌塵中見亦稀

送浦潛夫

吳江有高士讀書慕皇羲
心遠契一畫意得無九

師撻策筮嘉遯遂養丘園安荒江屋敲斜鷗鳥同
朝飢在昔洪丞相經略天南陞君佐幕中畫儼儼
復權奇試吏嶽麓下蒲鞭懸不施丞相解兵柄角
巾東第歸君亦困株木周道多蒺藜投賦汨羅岸
弔古湘妃祠歸吳二十載飄蕭雙鬚絲丞相宰木
拱部曲無復遺重來渡易水感激酬恩私慟哭龍
驤塋手刊第二碑袖中周易編未有君平知徒步
過市中塵染蒼浪髭湖南方用兵馬飲瀟湘湄辱
在卿大夫修劒空拄頤老子好奇計才鋒尚如錐
無人爲薦達垂老嗟數奇古王者行師必鑽九州

龜君書實有用足爲王伯資秋風動鱗甲扁舟犯
連漪白首抱遺經具區臥茅茨季主定捧腹高賢
當爲誰

張員外園亭送金山人歸越

客有越鄉感抱琴辭上京離堂秋月色別思楚鴻
聲水國三千里冰絃一再行成連何處去今夕獨
移情

葉丙霞祠部歸自虔南見示圍城詩

與君憐麥秀秋晚別朝歌亂後音書濶年來華髮
多西南方帶甲章貢幾橫戈不少陳琳檄頭風愈

若何

壬子與祠部別於衛州

文姬歸漢圖

宋南渡祇候司張某畫

大漠茫茫沙草枯
天蓋四野如穹廬
陰山秋高雪片麤
朔風中人金僕鐸
高飛鵠轉追韓盧
前行一馬建隼旗
後有數馬鳴相呼
尾鬣蜩縮慘不舒
馬蹄流血冰裂膚
蕃兒漢兒手口瘡
相顧不能鼓龍胡
文姬玉面貂襜褕
聳肩顰黛愁不娛
越燕向日思南徂
君獨何爲苦嗟吁
兜離窈停非故都
魂消影絕悲兩離
歸來爲公寫遺書
名在列女丹青俱
老瞞睨鼎目睢盱
破壁牽后如收孥
獨能千金歸

蔡姝吁嗟高義今已無

金孝章先生以壬子冬畫梅寄予兄弟今六年矣丁巳七月先生之子祖生至京師始見之而先生與先兄考功皆已下世愴然賦詩四首

拗取銅坑玉一枝江南春贈隴頭時到來已是塵沙劫賦得瑤華欲寄誰

維摩方丈幾黃昏春草禪房日閉門成佛生天兩

何處暗香疎影爲招魂

十笏先兄堂名春草禪房先生所居也

花時鄧尉夢無聊十七年來似暮朝恨不相攜風

雪裏短篷同繫虎山橋

當年五字寫柴桑又寄孤山世外香一幅生綃千載意也應配食水仙王

辛亥歲先生手
寫陶詩見寄

西蜀

唐家宰相迴翔地漢代公孫割據秋劍閣嵯峨仍北向彭門波浪自東流風雲諸將爭秦棧鼓角中宵夢益州何日西南銷戰伐浣花行樂看遨頭

送衛爾錫簡討謫判霸州二首

昨夜青綾被蕭條秋氣滋今朝白羽扇捐棄篋中時戀闕心仍苦投湘賦漫悲涼溫從此別行矣

歲寒期

聞君休沐暇卜築遠人閒門外河汾水窓中姑射山
正牙方引對小郡忽投閑詎厭承明直時清且抱關

送蒼水入閩同詡菴限韻

吾友有董生其人仁且勇突兀百尺桐疎枝上孤聳
故交久零落予髮亦種種京雒晚得子喜甚獲壁拱
愛我齋閣閑屢過聽寒菴說劍森星芒論文豁塵壅
爭道句踐家澆酒望諸冢飛煉君詠嘲支離我擁腫
驚君豹文變愧我牛革鞞長安競高貲

君獨愛散冗抱關不碌碌坐聽傳呼寵水東葉學
士步屨每接踵城北有徐公剥啄喜音楚滑稽愛
陳遵法度跂張竦懷古思贈縞閱世鄙登龍孟冬
十月交鳥獸始毛毼離顏慘不悅告我將發輶岵
嵒仙霞關峻絕逾上隴搖郢昔旅拒八郡紛洶洶
李絳墓未祭孟衢馬誰駮見公羊傳孰職爲亂階彼哉
微且腫天心昨悔禍稽顙紛萃從士有朝食銳軍
無夜呼恐君今輿轎度見漢書憶昔戈船踴我聞龍
伯釣一牓六鼃擁不如學詹何妙用獨繭蛹君行
宜勉旃吾道視輕重

哭劉公猷吏部二首

零落親知更有誰聞君訣去不勝悲彈琴古調千秋絕說劍雄風一代奇舊館脫驂應出涕天涯磨鏡是何時故人雙鬢蒼浪在賸欲刊君第二碑

廿年藝苑忝同遊迴憶音塵淚不收結客曾傾四

公子論兵欲動五諸侯

星名

故人半化遼東鶴世事

終輸閣道牛手定君文纔幾日可憐馬策慟西州

丙辰春先生以全集寄予論次

荅徐勝力二首

鴈門太守解食鴈豈識涼州皇甫規王符到門倏

曜故宅留山阿結鄰尚友亦不惡溪山況足供婆
娑名高身隱恐難得丈夫三十非蹉跎朝廷正須
雅頌手待汝清廟賡猗那

送田子綸郎中歸省

能詩何水部恩許片帆歸慈竹舍前長脊令沙
際飛梅花迎驛路臘酒熟柴扉獨有離居者依依
心曲違

座中聞陶季江辰六詠洞庭詩并話湖南山水二首

三湘夜雨五溪遊曾話秦淮風露秋十七年來頭

二五
鬢白聽君高唱岳陽樓

順治辛丑在金陵聞何行人談
湖南山水之勝今十七年矣

白蘋風色番君國斑竹啼痕帝女靈
今日衡湘兵甲滿九疑何處數峰青

帶經堂集卷三十二

帶經堂集卷三十三

歙門人程哲校編

新城王士禎貽上

漁洋續詩十一

戊午稿

蒙

恩頒賜五臺山新貢天花恭紀

有序

戊午閏三月

臣士禎同翰林院掌院學士

臣

廷敬侍讀學士

臣英中書舍人

臣士奇

內直南書房二十七日蒙

恩賜手詔

朕召卿等編緝適五臺山新貢天花鮮馨
罕有可稱佳味特賜卿等使知名山風土
也

臣

等恭逢異數謹拜手稽首賦詩進

呈

春直銅龍畫未闌忽傳天語下雲端名山包貢
來中禁珍賜封題出大官曾取稻梁縻厚祿敢忘
藜藿負儒冠宛然身到清涼境聖主恩深勝露
盤

蒙 恩頒賜

御書恭紀四首

有序

閏三月二十八日中書舍人

臣士奇齋

御書至南書房賜學士

臣

廷敬侍讀學士

臣方藹侍讀

臣

士禕

臣

得存誠大字唐人

張繼楓橋絕句又石刻清慎勤格物大字

二幅共四幅仍傳諭云前賜講筵諸臣石
刻爾士禎未與故特補賜二幅

承恩祕殿許從容

宸藻驚傳啓

御封天上墨

池春晝永親從九五見飛龍

元武門邊侍直餘淋漓飛白紀恩初從今不羨鍾

王蹟曾向雲霄捧

御書

謨誥文章雅頌詩鸞停鵠時幾人知毫端已見
宸心正不待誠懸筆諫時

蟠螭小壘映珊瑚錯落銀鈎筆陣圖寄語紫薇花

下客休誇三十四驪珠

宋臣蘇軾通英賜御書
詩云袖有驪珠三十四

賜貢茶三首

朝來八餅賜頭綱魚眼徐翻晝漏長青筠紅籤休
比並黃羅猶帶御前香

兩府當年拜賜迴龍團金縷詫奇哉聖朝事事
寬民力騎火無勞驛騎來

春旗焙出黃芽熟雲液烹來綠脚生身到九天餐
沆瀣不須消渴望金莖

賜櫻桃

綉葉紅葩下玉墀隋珠萬顆籠青絲侍臣早識華
林種恰及含桃薦廟時

賜櫻桃漿

色映琉璃得未曾涼風長日拂觚稜人間不識嘆
山雪天上新逢玉井冰

孝昭皇后挽詞六首應制

金祀流塵掩瑤齋寶幄空禁花零曉露苑柳泣春
風思媚傳千古深恩徧六宮唯留歌詠在應與二
南同

上壽慈寧日人知內則賢徽音殊未遠文母
至今憐淚濺鶯花色神傷袂禊天淒涼餘故館猶
近濯龍前

三
三
祕殿傳金策神人覆玉衣四星初應曜一鑑忽藏輝
脫珥言猶在乘雲馭不歸皇情宵旰切永巷漏依稀

萬乘親臨送容車出國門羽儀辭禁掖笳鼓望陵園
素旒浮雲慘青山落日昏臣民同雨泣哀動鳳凰原

西汜沈寒月中天澹夕陽愁雲低墮樹春禁罷公桑
楚挽蘭風寂虞歌薤露長通靈應有夢可到紫宸傍

渺渺沙河道淒淒玉輦空綺疏扃夜月總帳肅靈

風故劍

皇心切

謂仁孝皇后

祠官禮數同榮名綸綍貴

早貴九原中

御苑人參應

制

秀色青葱別舊蹊移來雙闕翠痕低不因身到甘泉館幾見仙苗五葉齊

大西洋貢師子歌應

制

古云狡狴日走五百里遠隔流沙生月氏康居疏勒曾一獻丹青顧陸矜神奇夙聞其名思一見玉關迢遞天西陲況復野千日鳴噪安得一吼驚嘍啾
聖人有道十七載景風海外舟車馳元龜象

齒紛置驛文犀桂蠹羅庭墀大秦之西國絕域懸
橦度索來數期厥有神獸備方物波濤遠迸蛟龍
隨海人泉客盡避徙朱衣絳幘不敢窺形狀瓌詭
氣奮迅目光睽睽毛彤彤巨髯毳筆尾如斗勁毫
柔毳相離披發聲殷其雷破壁顧盼已却千熊羆
乳虎犛牛望辟易何論六駮兼文狸搏象搏虎具全
力威在齒尾非毛皮上林晝閉射熊館 詔付象
胥有職司 聖朝寶德不寶物百獸率舞良所宜
五風十雨兆民足騶虞在囿麟來嬉寫入職方舊
圖繪二南萬古傳風詩

蒙 恩賜觀 御製詩集恭紀十六韻

聖主崇經術雍熙暨八荒鴻名垂海嶽重譯集梯
航雲物生松棟音徽嗣柏梁宜民期太昊訪道媿
軒皇嚴漏趨丹陛清秋屆白藏承恩披雅頌開帙
粲琳琅體配江河紀芒涵日月光宸衷羅武庫
台象接文昌氣邁三侯壯思深六義長銀鈎輝琬
琰錦字溢縑緗劍閣看雲合橫汾詠菊芳雄篇包
宇宙細律叶宮商寶鼎歆金景聯珠照玉堂微臣
依黼幄朴學愧青箱極北常瞻斗周南啓面牆賡
歌知莫繼永此戴天章

恭和 御製賜輔國將軍俄啓詩

有序

八月二十日內直同學士臣廷敬侍讀學士臣方藹臣英中書舍人臣士奇奉 旨

賦

宸章高視漢歌風絕技爭傳兩石弓自是 君王勤拊髀一時龍種盡英雄

送同年蔣大參之武林

持節錢塘去金焦二月時江山南渡蹟風物表忠碑河漕勞輸輓朝廷仰度支到逢寒食後槐火試雙旗

懷丁鴈水武選

時王師初平漳泉

愛君吟五字風格擅黃初
別後惠思我詩來常起
予軍中馳露布海上罷巢車
無恙圍城裏牙籤舊
賜書

簡山長從兄

向有別業在隨州時教授武學

浮家漢東國野圃樹千章
古岸臨清澹荒池弔季
梁微官傍雙闕歸夢渡三湘
何日烽煙息朱陵問
草堂

寄竟陵吳旣閑兼懷胡君信二首

聞道東湖隱頻年杜德機
水花當晝淨鷗鳥入門

飛白首遺經在青山舊業微漢朝多掌故誰受壁
書歸

獵火連雲夢悲笳激渚宮江湘多飲馬天地一冥
鴻漁唱花間穉炊煙雪後蓬祗應胡伯始來往此
牆東

螢

寂寂青苔徑蕭蕭白板扉天河垂近戶螢火坐侵
衣穿竹淺深見因風高下飛隋家無舊苑甘照讀
書幃

蟬

雙樹有鳴蜩孤情伴寂寥自緣飽風露不肯逐金
貂驛路關門雨斜陽浦岸潮年年行役處爲汝幾
魂銷

庭樹

庭中兩嘉樹歲歲發華滋斜照連疎雨清陰散碧
墀稍宜漆園吏誰賦角弓詩舊業清溪曲千章覆
短籬

蘇門三賢詩

有序

張于度

蘇門孫徵君曰于度爲鹿伯順高弟從子

五十年未嘗或離左魏之難履虎尾涉春
冰烈士之名滿天下卒歸老蘇門高蹈遠
隱志士不忘溝壑其庶幾乎于度名果中
容城人葬夏峰北原

明運昔中圯奄豎奸大位衣冠虛南牙政柄歸北
寺誰實鈎黨魁嶽嶽左與魏一朝檻車徵牢戶事
陰祕傷哉史弼言茶甘乃如薺容城有布衣發憤
亡鯁避要鎖理太尉舉幡訟司隸貫械渤海生赤
幘夏門吏桑海四十年往事如夢寐骨歸蘇門山
名在顧廚次

理寒石

本李姓也名鬯和西華人恥與逆闖同姓
改曰理孫徵君與西華左令書稱爲魯連
後一人

魯連蹈東海其志恥帝秦龔生天天年詎知有美
新陶公懷晉室聊存頭上巾嗟哉均埒流乃愧青
巖甄西華理寒石爲儒甘賤貧奉母蓬藿中歸潔
恐辱身梟鏡

破鏡與
鏡同

交蹄跡神州日沉淪靈氛久上

天呼號竟無因感激變姓名下士良苦辛何人傳
節義誦言聊一陳

餓夫

彭姓字了凡蠡縣人遭闖亂棄諸生客饒陽爲鄉塾師已而從孫徵君於蘇門或授之粟不受竟坐死嘯臺之旁徵君題其墓曰餓夫墓

黔敖呼餓人不受嗟來食使之當大事必讓千乘國靈輒餓醫桑倒戟一何力簞食不忘報竟脫宮甲逼蘇門有餓夫風節夙所植生餓蘇門下死葬蘇門側嘯臺高峨峨百泉流湜湜清風一相映泉石起寒色遐哉首陽薇千古長太息

山鷓

秋葉下庭樹飛來山鷓鴣寧因避珠彈只合傍金
鋪清唳雲中鶴晨飛煙渚鳬微生各情性太息羽
毛殊

藝圃雜詠十二首

爲蔡陽姜
學在賦

南村

豈知城市間村路忽超遠曖曖桑柘陰晨光散雞
犬應有素心人空林共偃蹇

鶴柴

長身兩君子宛與孤松映三疊素琴張一聲遠山

靜嘹唳月明時風泉雜清聽

紅鵝館

疏館籠鵝羣素羽臨秋水濯濯映鳬翁沿流亂芳
芷乞寫苗香花共入丹青裏

乳魚亭

幽人知魚樂爲復知魚計策策與堂堂宛有江湖
意時逐落花來更向空明逝

香草居

湘君遺遠時汀洲寥杜若菲菲來龍羣脉脉情相
託常恐鷗鷺鳴芳香坐搖落

朝爽臺

崇臺面吳山山色喜無恙朝爽與夕霏氤氲非一
狀想見拄笏時心在飛鳥上

浴鷗池

海鷗戲春岸時下池塘浴何樂從君遊忘機自馴
熟不用駭爰居朝朝泛寒綠

度香橋

陂塘何逶迤飛虹鏡中起但聞功德香都不辨花
水鼻受心已著遂契無言旨

響月廊

修廊非一曲窈窕隨清樾掃地坐焚香心跡兩幽絕
簌簌風蕭蕭無人見明月

垂雲峰

具區三萬頃奇峰七十二割取一片雲虎牙自孤銳
颯然山雨來咫尺流雲氣

六松軒

髯翁閱千歲纔如熟羊腴不逐桃李妍何妨雪霜壓
可望不可狎愛此李鱗甲

繡佛閣

樓閣衆香中日夕供調御仙梵遠蕭條隨風不知

處更有迦陵鳥聲來與多樹

爲尤展成悼亡三首

時子張宜
人未三載也

三年明月鑒虛帷那更吟君惆悵詩不分阿灰腸
斷句黃昏微雨畫簾垂

金昌亭下柳毵毵長記烏啼送曉驂風景不殊人
不見謝家飛絮滿江南

入洛相逢亦偶然淮南小別十經年不堪洗馬言
愁日無復清河贈婦篇

陳其年索詩送王生之襄陽

試說襄陽好曾遊路不迷江帆過峴首水竹繞檀

溪市上江陵估機中竇氏妻不知征戍後誰唱白
銅鞮

送陳子文之安邑丞四首

我愛田子方同時段干木高義動諸侯清風激頽
俗聞鍾知左高佳言足三復下車或式閭寧浼踞
堂辱斯人邈已遠餘韻留鄉曲賢哉魏成子千秋
擅遐躅

峨峨中條山迢迢涑川汜人物表西河流風至今
美陳侯東海來高文一何綺閭闔簫浮雲負絕致
千里自抱萬古心五斗焉足恥虜沱冰上渡故關

雪中啓懷古多遠情到官正春水目送中條雲松
風滌雙耳

騏驥服鹽車躑躅上虞坂山石何磽聲日暮途且
遠道逢紵衣惠未敢悲晚晚回首奮長鳴匝日思
一展譬彼軼世士遭時未離蹇君過虞坂上懷古
向陵緬古之賢達人澄懷善舒卷

淼淼沅湘流香草目以蘭鬱鬱徂徠松百尺凌歲
寒君子重結交貞固期不刊解巾二十載閱世如
波瀾苑枯旣以移素心良獨難喬木隱窮巷飢禽
噪簷間君偕辛齋叟時時造門端告我媯汭行能

不傷肺肝保此金石心在遠義亦安不見蕭長倩
錄錄曾抱關

題毛會侯垂竿圖

家在富春山山水何清妙朝與桐君遊夕狎狂奴
釣

王咸中石鵑山房四首

我愛堯峰叟

謂注
鈍翁

憐君比屋居雲林交罨畫煙火

共村墟顛倒牀頭屐逍遙谿上漁漢陰雞黍約今
古意何如

高情耽野逸文采舊清門

文恪公
裔孫也

跡與市朝遠心將

達者論飛泉晴界道修竹雨連村誰識逃名客蓬
蒿方灌園

心遠地仍偏琴書雜坐眠湖霜收橘日社火焙茶
天人意孤雲外山容太古前叩門田父至襍縷亦
欣然

筆墨誰能事吾宗今右丞

茂京舍人
作石鵲圖

悠然輞川路寫

向剡谿藤短笱宜行藥空林偶飯僧片帆天外影
興到直須乘

古詩荅金穀似

西山紛鈎綿具區遠泓崢巖洞旣殊麗草木滋鮮

榮靈威古文人素書發其英千載多秀民游札高

人名昔聞夫子賢乃自長洲生

鈍翁

五經何紛綸七

略亦縱橫提攜吳純鈞落筆千天精相思二十年

無由達中誠都門競錐刀車馬如踐更不解作高

髻誰與爲目成昨者枉佳贈其言明且清賦詩備

三類餘音散鯨鏗顧慙實不腆欲報無瑤瓊自非

揚盼流詎曰知駿明矧子少而颺執手安敢輕

來詩有云

儻無敵器言

堂下失駿茂悉索固所願毋爲笑荒僮

送宋牧仲員外推贛州四首

都亭一樽酒落日照行軒帆下潯陽郭春過敷淺

原故人持使節微尚愛丘樊想到西林寺清吟和
夜猿

文成誓師處慘澹尚聞笳野戍青山遠荒江白日
斜春風渡蛟浦夜雨宿龍沙戰地多新鬼須添兩
鬢華

章貢交流地孤城百戰餘江山應不改父老問何
如五嶺稀烽火三湘動羽書似聞兵馬後租賦未

全除

後月餘有、言
盡蠲江西通糧

贛石三百里寒江尺五流帆檣來島客風物逼炎
州試訪端明蹟應懷清獻遊山川供嘯詠莫似賈

胡留

九日寄說巖院長訥菴學士

二公向
同內直

泐寥天氣渺愁子無恙黃花伴索居江介鼃鼃聞

漸徙

時聞茶陵
湘潭捷

鄉園鴻鴈近何如千門落照涼颼發

一片寒砧木葉疎遙憶故人清切地登高彩筆奉
宸輿

以昌樂筆送容齋閣學戲成

承旨歸來每日曛揮毫猶足張

去聲

吾軍只愁坡老

三錢筆難稱郇公五朶雲

荅徐東癡隱君小雪見懷之作

積雪東原路孤村似剡溪幾年阻乘興千里憶幽
棲凍雀柴門掩寒煙古木齊不逢洛陽令僵卧到
晨雞

同施愚山陳藹公集山史從兄昊天寺寓觀
唐子華水仙圖

先生舊隱三峰椒太乙玉女時招邀秦都漢時一
蟻垤目翫易象窮昏朝蒲車應詔謝賓客城西
古寺風蕭蕭殘碑老樹氣象古涼衫重戴風神超
八騶喧闐不到此兩三素侶還相要殘冬氣暖似
吳越佛香入院鐘魚飄徐出一軸自拂拭古光黯

澹生鮫綃青峰出沒高歷歷海天萬里迴春潮仙
人綽約駕雲氣飛龍決起橫煙霄六銖衣輕逐風
舉熒熒顏色如陵茗四座咨嗟歎奇絕倏乘六氣
遊空寥子春一去伯牙逝海波汨沒秦人橋君歸
西嶽望東海齊煙九點非迢遙

題龔節孫種橘圖二首

震澤鱸魚欲上竿千林風露熟金丸美人無事披
香坐領得頭銜是橘官

會稽內史風流甚三百封題引興長何日扁舟洞
庭上與君小摘滿林霜

題陳其年填詞圖

玉梅花下交三九

其年詞句

紅杏尚書枉擅名記得微吟

倚東閣梅花如雪撲簾旌

送陳子萬之黎城丞二首

美人爲政太行西到及人侵五葉齊
頗憶故園風物否白雲紅樹滿荆谿

欲別梁園風葉涼銅鞮山色望蒼蒼
主人本自漁樵侶小吏何勞鴈鶩行

題喬子靜桃花流水圖

青山白雲外合沓無終始小艇漾溪流
幽興何窮

已夾岸桃花林連綿復相似落英正繽紛芳草亦
鮮美茗碗置船頭簞簟挂船尾不愁風水逆去住
皆可喜儻遇避秦人或逢鬼谷子鸞嘯一迢然沙
禽忽驚起

洪昉思送湖州茶筍二絕句

愛道前溪似若耶行旃歸去便移家匆匆未訊溪
山好第一先分顧渚茶

周妻何肉斷根塵玉版聊堪結淨因贏得武康斑
竹筍從今休笑庾郎貧

送黃俞邵南歸

夢裏啼烏繞北堂麻衣十月薊門霜當年萬里瞿
唐客送遠驚心淚幾行

康熙壬子予奉命試蜀先宜人見
背不及視含殮情事與俞邵正同

帶經堂集卷三十三